

Aen Doih Bauqva Gvangjsih Ciengz-ciengz Hingz Ndaej Itdaengjciengj

Bonjbauq siusik(Cau Dwzfeih Liengz Cingz) Ndwen 9 ngoenz 14 banhaet, Gaiq Daihcib'it Daengx Guek Siujsoq Minzcuz Cienzoengj Dijyuz Yindungvei doxciengj bauqva ceng mingz daih'it youq Cwngcouh Dayoz banh. Buenq ciengz gonq aen doih Baekging 1:0 lingxdaeuz, aen doih Gvangjsih boux ciengj ak\duicangj Liuz Yungjli deng sieng roengz ciengz. Buenq ciengz laeng haiciengz mbouj nanz, aen doih Baekging youh ciengj ndaej aen bauqva ndeu, 2:0. Aen doih Gvangjsih mbouj doeknaiq saekdi, buekmingh ciengj, doenggvaq baez doxgap ndeindei ndeu ciengj ndaej aen ndeu, riengz dwk youq mwh hoenxgung doiqfueg famhgvi, ndaej vut baez bauqva roengz lamz ndeu, beijfaen 2:2. Gya seiz 6 faen cung song mbiengj mbouj ndaej saek faen, lij dwg 2:2, doeklaeng doenggvaq vut bauqva roengz lamz faen saw hingz, aen doih Baekging vut 5 baez vut deng baez ndeu, aen doih Gvangjsih vut 4 baez vut deng 2 baez, doeklaeng aen doih Gvangjsih 4:3 ciengj hingz aen doih Baekging, souj maenh mingz daih'it, aeu ndaej it daengjciengj faenliengh cei naek gaiq minzcuz yindungvei neix.

Ciuq cam rox, aen doih Gvangjsih caeuq aen doih Baekging dwg duiouj geq lo. Gaxgonq 4 gaiq daengx guek siujsoq minzcuz cienzoengj diyyuz yindungvei, aen doih Baekging 4 baez ndaej ciengj mingz daeuz ngeih, 3 baez saw aen doih Gvangjsih, dan youq bi 2011 hingz baez ndeu. Neix dwg song aen doih baez daihhaj youq daengx guek siujsoq minzcuz yindungvei ciengj mingz daeuz ngeih doxbungz. Gaiq yindungvei neix, song aen doih youq siujcuisai hix doxbungz gvaq, aen doih Gvangjsih 5:3 ndaej hingz.



▲Aen doih bauqva hwnj daiz lingx ciengj.



▲ Ciengj ndaej hingz le, vut bouxson hwnjdaej.



▲ Doxdax ciengj bauqva ndeiyawj dangqmaz.

◀Duiyenz caez angqyangz.



Gvangjsih Hoznanz Ranz Vunz Ndeu, Bet Nyied Cibngux Gvangjsih Daibyauidonz Gvaq Ndaej Sim Raeujrub



▲Caezgya ciengq 《Gou Caeuq Guekcoj Gou》.



◀ Bouxyienj danz ciengq dingzdingj.

▶ Bouxyienj yienj Heiqhoznanz.



Bonjbauq siusik(Cau Dwzfeih Liengz Cingz) Cwngcouh Yungjhozbwz-gyoz Gozci Ciujden aen dingh gwn haenx daeng nding daeng loeg, nauhyied dangqmaz, aen vanjei bet nyied cibngux lienzhaeh cingngeih Gvangjsih Daibyauidonz、Cwngcouh Cwngdungh Sinhgih youq neix banh. Ndwen 9 ngoenz 13 banhaemh, doengh boux lingjdauj Cwngdungh Sinhgih Gvanjvejvei aen

danhvei doiq dakdaih gaiq yindungvei neix、Yungjhozbwzgyoz Gozci Ciujden bouxguhong caeuq Gvangjsih Daibyauidonz 400 lai vunz doxcomz giz ndeu, caez angqyangz gvaq ciet bet nyied cibngux.

Doenghgij hozdung caezangq Cwngdungh Sinhgih caeuq Gvangjsih Daibyauidonz roengzsim caepcawq neix doxlwnz hwnj daiz yienj, langhbaij gij yinxdaeuz vwnzva doxgap. 《Fouxdoengh Cunghyenz》、heiq Hoznanz 《Ram Giuhva》、denyingj 《Saulinzsw》 diuzgo cawjdaez ——《Go Langh Yiengz》 daengj cezmuz biujyienj hawj Gvangjsih Daibyauidonz roxnyinh daengz le Hoznanz Cunghyenz vwnzva laegna, 《Fwenlaej Bouxcuengh》、danz ciengq dingzdingj 《Cuengq Vadaeng》 daengj cezmuz biujyienj hawj gyoengq beixnuengx Hoznanz daejniemh daengz Gvangjsih siujsoq minzcuz fungcingz lai cung lai yienh.

Vanjei satbyai, daengx ciengz vunz vad mbaw geiznding ndaw fwngz, caez ciengq 《Gou Caeuq Guekcoj Gou》, daengz neix vanjei sat lo.